

Naalakkersuisut suliffissaaleqinerup ataavartumik akiorneqarnissaanik siunertaqartumik ataatsimoorussamik pilersaarummik piaartumik suliarinninnissamik peqquneqarnissaannik Inatsisartut aalajangiiffisassaattut siunnersuut. Pilersaarummi Sanaartugassanut Iluarsagassanullu Aningaasaateqarfimmi aningaasat uninngaannartut inuiaqatigiit akornanni sulisinneqalernissaannik, nunaqarfinni aali-sakkerivinnik sullissinissamut isumaqatigiissutininut aningaasaliissutit amerlineqarnissaannik kiisalu illersorneqarsinnaasumik aalisagartassat amerlineqarnissaannik imaqassaaq. Pilersaarut Inatsisartut ataatsimiinneranni maanna ingerlasumi saqqummiunneqassaaq.
(Siumup Atassutillu Inatsisartunut ilaasortaataat)

aamma

Nunatsinni annertuumik suliffissaaleqinerup piaartumik ataavartumillu annikillisinneqarnissaa siunertaralugu Naalakkersuisut ataatsimoortumik periusissamik Inatsisartunut saqqummiussaqaarnissaannik Inatsisartut aalajangiiffisassaattut siunnersuut
(Inuit Ataqtigiit, Partii Inuit, Partii Naleqqap Inatsisartunut ilaasortaataat)

pillugit

Inuussutissarsiornermut Ataatsimiititaliap

ILASSUTITUT ISUMALIUTISSIISSUTAA

Siunnersuutit aappassaaneerneqarnerannut saqqummiunneqartoq

Ataatsimiititaliaq suliarinninnermini ukuninnga inuttaqartoq:

Inatsisartunut ilaasortaq Knud Kristiansen	(A)	siulittaasoq
Inatsisartunut ilaasortaq Ruth Heilmann	(S)	siulittaasup tullia
Inatsisartunut ilaasortaq Saxtorph Didriksen	(S)	
Inatsisartunut ilaasortaq Karl Kristian Kruse	(S)	
Inatsisartunut ilaasortaq Andreas Uldum	(D)	
Inatsisartunut ilaasortaq Aqqaluaq B. Egede	(IA)	

1. Ataatsimiititaliamit suliarineqartussatut innersuusseqqinneq

Inatsisartut suleriaasianni § 15, imm. 1 innersuusutugalugu siunnersuutip matuma isumaqatiginninniutigineqarnera siunnersuutit ulloq 27. maj 2014-imi aappassaaneerineqarneranni unitsinneqarpoq. Siunnersuutit ataatsimiititaliami nutaamik suliarineqartussatut innersuunneqarput, allannguutissatut siunnersuummik naaperiarfiussamik ataatsimiititaliap isumaqatigiissuteqarniarnissaa Inatsisartunit kissaatigineqarmat.

2. Allannguutissatut siunnersuut

Inuussutissarsiornermut Ataatsimiititaliap isumaqatigiittup siunnersuutitut allannguutissatut siunnersuut imaattoq matumuuna saqqummiuppa:

Illassutitut isumaliutissiisummi imm. 2.1-imi suliniutit tunaartarisassallu matuma kinguliani allassimasut aallaavigalugit piffissami qaninnerusumi ungasinnerusumilu suliffissaaleqinerup akiorniarneqarneranut ataatsimut suliniutinik aallartitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut:

2.1 Suliniutit tunaartarisassallu

Piffissami qaninnerusumi makku suliniutigineqassapput:

- Pisassiissutit amerlineqarnissaannut periarfissanik misissuinikkut pisuussutitta uumassutillit, tassunga ilanngullugit saarullit piujuartitsinissamik tunngaveqarluni iluaqutiginiarneqarnerat annertusarneqassaaq.
- Misileraalluni aalisarnerup annertusarneqarnissaanut aningaasanik immikkoortitsisoqassaaq ilaatigut nuussinerit aqutugalugit.
- Suliniutit nunatsinni tunisassiassanik suliareqqiisarnermut taakkulu piumaneqarnerannut siursaataasinnaasut ingerlaannaq aallartinneqassapput.
- Sulisussat avataaneersut inatsisinik unioqqutitsisut nakkutilliivigineqarnerat sukateriffigineqassaaq.
- Sanaartugassanut aningaasaliiffigineqareersut pilertornerusumik piviusunngortinneqarnissaat siunertaralugu Sanaartugassanut Iluarsagassanullu Aningaasaateqarfimmi aningaasat katersorneqartut pitsaannerusumik atorneqartarnissaat siursaavigineqassaaq, tamatumalu peqatigisaanik sanaartornerit nakkutilliivigineqarnerat eqqumaffigineqassalluni.
- Suliniutit sulisussanut tikisitanut taarsiullugu sulisussat nunaqavissut ilinniarsimasut sulisussarsiarineqarnissaannut siursaataasut aallartinneqassapput.

- Tunisassiassat nunatsinneersut annertusarlugillu suliareqqinneqarnissaannut periarfissat annertusarneqassapput aammalu najukkani nerisassanik imminut pilersorneq annertusarneqarluni.
- Nunaqarfinni isorliunerusunilu kiisalu illoqarfinni mikinerusunil suliffissaaleqinermik annertuumik eqqugaasuni sanaartornissaq siunertaralugu 2015-imi aningaasanut inatsisissatut siunnersuutip piareersarneqarneranut atatillugu mandtiiminut tapiissuteqartarnermik aaqqissuunerup eqquteqqinneqarsinnaaneranut periarfissat misissorneqassapput. Tamatumani nunaqarfinni isorliunerusunilu arnat eqqarsaatigalugit suliniutit sorliit aallartinneqarsinnaanersut aamma nalilerneqartariaqarpoq.
- Anguniakkat kissaatillu 2014-imi maajimi Ilulissani nunaqarfiit pillugit ataatsimeersuarnermi saqqummiunneqartut erseqqissarneqassapput, taamaalilluni taakku siunissamut ungasissumut isigisumik suliniutinut ilanngunneqarsinnaaqqullugit.
- Suliffissaaleqissut immikkoortiterneqarnerat allaffissornikkut piaartumik misissorneqarlunilu sukateriffigineqartariaqarpoq, taamaalilluni suliffissaaleqisut immikkoortiterneqarneranni suliffissaaleqisut immikkoortumut eqqortumut ersarinnerusumik piginnaasaalu eqqorlugit siunissami inissinneqartarsinnaaqqullugit.
- Meeqqanik innarliisimanginnermik uppernarsaatinik tunniussisarnerit sulissutigineqassapput, taamaalilluni perorsaasutut atorfiit inuttaqanngitsut pilertornerusumik inuttalerneqarsinnaaqqullugit.
- Inuusuttut arnat angutillu 30-t ataallugit ukiullit pitsaanagerusumik suliniutigineqassapput, tassunga ilanngullugu Piareersarfimmi inissat naammannersut qulaajarneqartariaqarluni.

Piffissami ungasinnerusumi suliniutissat iliuusissatut pilersaarummut aalajangersimasumut Inatsisartut 2014-imi ukiakkut ataatsimiinneranni isumaqatigiinniutigineqartussanngorlugu Naalakkersuisunit saqqummiunneqartussamut katersorneqarlutillu nassuiarneqassapput. Pilersaarut ilaatigut tunaartarisassanik ingerlatanillu makkuninnga tunngaveqassaaq, tamatumani Naalakkersuisut ataani allassimasunut tapertassatut namminneq piumassusertik malillugu pilersaarut ataatsimoortunngortissavaat, ineriartortissavaat tunngavilersorlugulu:

- Aaqqissuusaanikkut inatsisitigullu, tassungalu ilanngullugu akileraartarnermut tunngasuni suliniutigineqarsinnaasut qulaajaavigineqassapput, tamatumani nalikilliliisarnermut maleruagassat inuussutissarsiutinik ingerlatsisut akilersinnaasumik ingerlatsisinnaanerannut pingaarutillit tamatumalu kingunerisaaniki nunatsinneersut suliffissanik pilersitsisinnaanerannut periarfissat misissorneqassallutik.

- Tunitsiviit aserfallassimasut paasiniarneqarnissaannut aammalu taakku iluarsaanneqarnissaanni aningaasartuutitut missingersuutit suliaqarnissamat aningaasanik immikkoortitsisoqassaaq aammalu sumiiffinni suliffissaaleqiffiusuni tunisassiassaqarfiusunilu naleqquttunik tunitsivinnik pitsanngorsaaniissamat iluarsaanissamullu atugassanngortitanik nunaqarfinni isorliunerusunilu suliffeqarfinit namminersortunillu allaffissornertaqarpallaanngitsumik pisariitsumillu qinnutigineqarsinnaasunik aningaasanik immikkoortitsisoqarluni.
- Sulisinnaasut nuttarsinnaanerannut akimmisaarutit aammalu sulinerup aamma/imaluunniit suliassanik malersuilluni nuunnerup aningaasaqarnikkut iluaqutissarsiffiunnginneri suussusersineqassapput kiisalu ajornartorsiutit taakku suujunnaartinnissaannut/ikilisarneqarnissaannut siunnersuusiortoqassalluni.
- Inuussuttut, tassa imaappoq 30-t inorlugit ukiullit suliffissaaleqinerat akiorniarlugu immikkut ittumik suliniuteqarnissaq pilersaarusiorneqarlunilu ingerlanneqassaaq.
- Suliffissaaleqisut pilertornerusumik pitsaanerusumillu suliffissarsiorneqartarnissaat siunertarlugu suliffissaaleqisunik immikkoortitereriaaseq sukumiisumik nalilersoqqinneqassaaq. Tassunga ilanngullugu suliffissaaleqisut piukkunnaatillit piginnaasaminnik ineriartortitsinissamat innersuunneqartassallutik, taamaalilluni suliffissaaleqisut sulilernissaminnut piareersimangitsut suliffeqarfinit pilerineqalersinnaaqullugit.
- Suliniutissat pisortat namminersortullu sanaartorneranni ilinniartussanut inissat amerlisarneqarnissaannut naleqquttut inerisarneqartariaqarput.
- Suliniutit nunami tunitsivinni aalajaatsumik suliassaqarnissamik siuarsaanissamat naleqquttut ineriartortinneqarnissaat siunertarlugu aalisarnermik inuussutissarsiornermi ingerlatsisut angisuut, soorlu Royal Greenland, Polar Seafood, Hallibut Greenland il.il. aaqquissuusaanerusumik suleqatigineqarnerat pilersinneqassaaq. Tassunga atatillugu kiffartuussinissamik isumaqatigiissutit aqutigalugit suliffissanut ataavarnerusunut ikorfaartuutissatut periarfissat misissorneqassapput.
- Inuussutissarsiutigalugu aalisartut tunisaqarsinnaanerannut killersuutaanngippat sunngiffimi aalisartartut aalisakkanik tunisisinnaanerisa annertusarneqarnissaannut periarfissat misissorneqassapput.
- Suliniutit, suliffissat nunani allaniittut Kalaallit Nunaannut nuunnerisigut nunatsinni aalisakkanik suliffissuaqarnermut siursaataallutillu ersarissaataasinnaasut ineriartortinneqassapput.
- Sulisussat nalinginnaasumik piginnaasaasa qaffassarneqarnissaat siunertarlugu ilinniarfiit ilinniartullu ineqarfii piumaneqarnerpaat pisariaqarnerpaallu amerlisarnissaa pisariaqarpoq, taamaaliornikkut ungasinnerusoq isigalugu tikisitanik

- sulisoqarnissamik pisariaqartitsineq annikillisarneqarsinnaaqqullugu tamatumalu peqatigisaanik sanaartornermi suliffissat amerlisinneqarsinnaaqqullugit.
- Nunalerinermik inuussutissarsiutillit nunatsinnut tunisassiornerat suliffissaqartitsinerallu annertusarneqarsinnaaqqullugit nunalerinermi maskiinat allallu taarsersorneqarnissaannut nutarterneqarnissaannullu aningaasalersueriaasissamut iluaqutissarsiffiusinnaasumut periarfissat tunngavissallu misissorneqassapput.
 - Suliffissaaleqinerup ungasissumut isigisumik annikillisinneqarnissaanut suliniuteqarnissami kommunit suliffeqarnermilu illuatungerisat peqataatinneqarlutillu oqaloqatigineqassapput, taamaaliornikkut suliniutit tamat oqartussaaqataanerannik suliassanillu ilisimasaqarluarnermik tunngaveqarsinnaaqqullugit.
 - Suliaqarfiit nutaat suliassaqarfiillu inerikkiartorfiusinnaasut iluini suliffissanik nutaanik ataavartunillu ineriartortitsinissamut atugassarititaasut qanoq pitsanngorsarneqarsinnaanersut misissuiffigineqassaaq.
 - Suliniutissatut siunnersuutigineqartunut naligiimmik pinninnissaq tunngavigineqassaaq, tassami suliffissaaleqineq arnaagaanni angutaagaanniluunniit assigiimmat – arnat suliffissaaleqinerat angutit suliffissaaleqinerannit minnerunngilaq.
 - Akileraarutit eqqarsaatigalugit sulinissaq qanoq ilillugu kajuminnarnerulersinneqarsinnaanersoq misissorneqartariaqarpoq. Tassunga ilanngullugu isertitanit akileraarutit, ingerlatseqatigiiffinnut akileraarut aammalu suliffeqarnermi sulinermilu nalikilliliinissamut periarfissat pitsanngorsarneqarnerani qanoq sunniuteqarsinnaanersut ilaatigut misissorneqarsinnaavoq.
 - Suliniutit suliffeqarfiit sulisussallu nunatsinneersut IBA-mik isumaqatigiissutit aqputigalugit aatsitassarsiornermik suliniutini peqataanissaannik siuarsaataasinnaallutillu qulakkeerinnissinnaasut misissorneqarlutillu inerisarneqassapput.
 - Suliniutit issittumi ilisimatusarnikkut ingerlatani nunatsinneersut peqataanerannik siuarsaataasinnaasut misissorneqarlutillu ineriartortinneqassapput.
 - Tutsuiginninnginneq asissuinerillu aqputigalugit kikkulluunniit suliannut pikkorinnerulersinnaanngitsut nassuerutigalugu suliffimmik paarsisinnaaneq akisussaaffiginninnerlu aammalu sulisut atugaannik imminullu tatiginerannik pitsanngorsaataasinnaasunik qanoq inerisaasoqarsinnaalluni isumannik allanngortitsisoqarsinnaanersoq isumaliutigineqassaaq. Tamatumani siunertarineqarluni sulisussat nunatsinneersut suliffeqarnermi unammillersinnaanerannik pitsanngorsaanaissaq nukittorsaanissarlu.

- Sulininiutini nuna tamakkerlugu nunallu immikkoortui tamarmik aallaavigineqassapput.

Naggasiullugu ataatsimiititaliaq qinnuiginnippoq suliniutit aallartinneqartut allalluunniit pillugit ingerlaavartumik ilisimatinneqartarnissamik.

3. Ataatsimiititaliap inassuteqaatai


(Ataatsimiititaliap aappassaaneerinissammut isumaliutissiissutaani 21. maj 2014-imi tunniunneqartumi inassuteqaatit taarserpaat.)

Ataatsimiititaliap isumaqatigiittup allannguutissatut siunnersuut akuerineqassasoq inassutigaa

Allannguutissatut siunnersuutit uku imm. 20/21-p aappassaaneerneqarnerani Inuussutissarsiornermut Ataatsimiititaliap isumaliutissiissutaani saqqummiunneqartut matumuuna tunuartinneqarput:

- Allannguutissatut siunnersuut Siumumit Atassumillu saqqummiunneqartoq:
Tunuartinneqarpoq
- Allannguutissatut siunnersuut Inuit Ataqtigiinnit saqqummiunneqartoq:
Tunuartinneqarpoq
- Allannguutissatut siunnersuut Demokraatinit saqqummiunneqartoq:
Tunuartinneqarpoq

Taama oqaaseqarluni ilassutitullu isumaliutissiisummi oqaatigineqartutut paasinnilluni ataatsimiititaliap siunnersuut aappassaaniigassanngorteqqippaa.



Knud Kristiansen
Siulittaasoq



Ruth Heilmann



Karl Kristian Kruse



Andreas Uldum



Aqqaluaq B. Egede